

## Lutjet themelore (shqip)

Engjëlli i Zotit

Engjëlli i Zotit iu fal Zojës Mari; e ajo ngjizi për virtyt të Shpirtit Shenjt.

Të falemi Mari...

Ja shërbëtorja e Hyjit; u bëftë me mua si është fjala jote.

Të falemi Mari...

E Fjala u bë njeri; e banoi ndër ne.

Të falemi Mari...

Lutu për ne, o e shenjtja Nënë e Hyjit; të bëhemi të denjë për premtimet e Jezu Krishtit.

Të lutemi: Hirin tënd, po të lutemi, o Zot, ndikojë në shpirtin tonë, që sikurse në lajmërimin e engjëllit na e zbulove mishërimin e Birit tënd, Jezu Krishtit, nëpër mundime e kryq të tij na udhëhiq në lavdinë e ringjalljes. Nëpër Krishtin Zotin tonë. Amen.

Mbretëreshë e qiellit

- Mbretëreshë e qiellit, gëzohu, Aleluja.

- Se ai që meritove për ta bartur, Aleluja.

- U ngjall si pati thënë, Aleluja.

- Lute për ne Hyjin, Aleluja!

- Gëzohu e galdo, Virgjëra Mari, Aleluja.

- Zoti u ngjall me të vërtetë, Aleluja.

Të lutemi: O Zot, që nëpër ngjalljen e Birit tënd, Jezu Krishtit, u denjove ta ngushëllosh botën, bëj që nëpër Nënë e tij, Virgjërën Mari, të fitojmë ngushëllimet e jetës së amshuar. Nëpër Krishtin, Zotin tonë. Amen.

Trinisë së Shenjtë

Besoj në ty, o Hyj i vërtetë dhe i vetëm, në tre Veltje të njëjta e të dallueshme, Atë dhe Bir dhe Shpirt Shenjt, që ke krijuar gjithçka, e ruan dhe e udhëheq, që i jep secilit sipas meritave të tij çmimin dhe dënimin e amshuar. Besoj se Biri i Hyjit është mishëruar për të na shpëtuar me vdekjen e tij në kryq dhe me ringjalljen e tij; që Shpirti Shenjtë na shenjtëron me hirin e vet. O Hyji im, besoj dhe shpall gjithçka që ti ke zbuluar, që Jezu Krishti ka mësuar, që apostujt kanë predikuar, dhe atë çfarë Kisha e shenjtë katolike romake na propozon për të besuar. Besoj të gjitha këto sepse ti, o Hyj, je e vërteta e përjetshme, e pafund dhe e pagabueshme. O Zot rrite fenë time.

O Hyj, unë shpresoj dhe besoj në mirësinë tënde dhe në mëshirën tënde të pafund, që për meritat e Birit tënd hyjnor Jezu Krishtit do të më japësh gjatë jetës sime njohjen, pendimin e sinqertë dhe faljen e mëkateve të mia, shpresoj që pas vdekjes sime do të më dhurosh lumturinë e përjetshme dhe hirin për të të soditur, dashur dhe gëzuar pa fund në qiell. Përveç kësaj, shpresoj nga ti hiret e nevojshme për të merituar gjithë këtë, dhe e shpresoj sepse e ke premtuar ti që je i gjithëpushtetshëm, besnik dhe i mëshirshëm. O Zot rrite shpresën time.

O Hyji im, të dua me gjithë zemër, sepse je i përkryer, je e mira më e lartë, dhe je i denjë për gjithë dashurinë time; të dua sepse je pafundësisht i mirë me mua dhe me të gjitha krijesat. Dëshiroj të të dua me gjithë zemrën time dhe dua ta bashkoj dashurinë time të pa përkryer me atë të shenjtërve të mëdhenj. Shtojë gjithnjë e më shumë në mua, o Hyj mirësie!

## Hyjit Atë

O Zot, ti je i madh

O Zot, ti je i madh dhe i denjë për çdo lavdi; fuqia jote është e madhe dhe dija jote e pakufi! Pavarësisht prej kësaj, qenia njerëzore, një pjesë e vogël e krijimit tënd, guxon të të lavdërojë; kjo krijesë njerëzore e rënë dhe e vdekshme, e ndërgjegjshme për mëkatin e vet dhe e vetëdijshme se ti u kundërshton krenarëve. Megjithatë ti vetë dëshiron që të lëvdojmë me zemër të gëzueshme, pasi që na ke krijuar për ty dhe është e shqetësuar zemra jonë derisa nuk pushon në ty. (Shën Agustini)

Dashuria ime e madhe

O Dashuria ime e madhe, e mira dhe lakmia ime e vetme! Si mund të ekzistojë një krijesë arsyetuese që nuk din të dojë? Të dua, o Hyji im, me gjithë shpirtin tim, dhe gëzohem edhe për lavdinë dhe madhërinë tënde. Me kënaqësi unë do të të jepja gjithë qenien time dhe gjithçka që kam, dhe do të të dhuroja krejt jetën time nëse do të shërbente për të përhapur lavdinë tënde; por kjo është e pamundur, pasi që ti je burimi origjinal, nga i cili buron çdo e mirë që ishte, që është dhe që do të jetë. Kush nuk don të të duajë ty, ëmbëlsinë më të madhe, të përkryer dhe të vetmen të mirë tejet të dashur? Zjarr gjithmonë i ngrohtë që nuk shuhet kurrë, më ndiz dhe unë do të ndriçoj; do të ndizem krejtësisht për të dashur vetëm ty, në gjithçka dhe mbi gjithçka. Në të vërtetë, nuk mund të të dojë kush don diçka jashtë teje, ose kush nuk don gjërat për dashuri ndaj teje. (Shën Agustini)

Hyji im, pendohem

O Hyji im, pendohem me gjithë zemër për mëkatet e mia, jo vetëm se të kam fyer ty, gjykatësi im i drejtë duke merituar ndëshkime, por, posaçërisht se të kam fyer ty, Zoti im e Hyji im, Krijuesi dhe Shpëtimtari im, Bamirësi, e Mira ime tejet e dashur, që dua mbi çdo gjë. I kundërshtoj me neveri të gjitha mëkatet e mia dhe vendos ngultas të të mos fyej më dhe të shmang me kujdes rastet e mëkatit. Më përforco, o Hyji im në këtë premtim të shenjtë. Mos më braktis në luftën e vështirë kundër mëkatit; më mbështet në dobësi dhe më ndihmo për të fituar mbi tundimet. Hyji im e Ati im, dorëzohem krejtësisht në mëshirën tënde. Amen.

Jezu Krishtit

Shpirti i Krishtit

Shpirti i Krishtit më shenjtëro mua, Korpi i Krishtit më shëlbo mua,  
Gjaku i Krishtit më ngij mua, uji i kraharorit të Krishtit më pastro mua.  
Mundimi i Krishtit më forco mua, o i ëmbli Jezus më dëgjo mua,  
ndër plagët e tua më fsheh mua, mos lejo të ndahem prej teje,  
prej armikut të shpirtit më del Zot mua, në fill të vdekjes sime ti më thirr mua.  
Bëj që unë të vij tek ti, e me shenjtër të lëvdoj ty, përgjithmonë e jetës. Amen.

O Zemër e Jezusit, të dua

O Zemër e Jezusit të dua, sepse ti më ke dashur e para.  
Merre zemrën time, më jep tënden, bëj që të dyja të jenë një e vetme.  
Ajo që të pëlqen ty të më pëlqejë edhe mua.  
Ajo që nuk të pëlqen ty, të mos më pëlqejë as mua.  
Dua të të dua në prova dhe në gëzime.  
Dua të të dua në dhimbje dhe në mundim.  
Asgjë nuk dua jashtë teje, sepse ti o Jezus, je gjithçka për mua!  
Jezus, dashuria jote është tejet e madhe

Jezus, Dashuria jote është tejet e madhe! Po unë çfarë mund të të ofroj? Çfarë mund të them? Më vjen shumë keq që në asnjë mënyrë nuk mund të tregohem mirënjohës ndaj asaj që ti ke bërë për mua, në mënyrë të veçantë në këtë Sakrament të adhureshëm të dashurisë sate që në vetvete përfshin të gjitha mrekullitë.

Ti më do me dashurinë tënde të pafundme hyjnore dhe unë nuk di se si mund ta shpërblej me dashuri dashurinë tënde... Mjerimi im më sugjeron të rri larg teje me respekt. Megjithatë a mund ta mohoj unë përgjigjen e dashurisë ndaj një Zoti kaq të dashur dhe mos t'i përgjigjem ftesës së tij kaq të dashur? Në asnjë mënyrë! Dashuria jote aq e kujdesshme dhe bujare, me plot ëmbëlsi më detyron të afrohem kah ti. Prandaj po vij tek ti, Hyji im, që don të jesh i Përzgjedhuri im. Ti je dashuria ime e vetme. Sa të çmueshme janë momentet e pranisë tënde në zemrën time! E mira ime më e madhe, Jezusi im, Zoti im e Hyji im! Me të vërtetë ti je dashuria ime. Bëj që unë të jem krejtësisht dashuri!

Hyji im jeton në zemrën time

Hyji im jeton në zemrën time dhe unë jetoj në Hyjin tim! Jezus, të adhuroj. Ti je Hyji im, Krijuesi im, e mira ime më e madhe. Zhytem në asgjënë time para madhërisë dhe madhështisë sate. O Hyj që më do deri në atë pikë që të jetosh në shpirtin tim, a mos ndoshta ke harruar kush jam unë? A ke harruar sa kam mëkatuar kundër teje? Sa keq më vjen për këtë. Do të dëshiroja aq shumë që mos të të kisha fyer kurrë, ty Zot i botës.

Shpëtimtar i mëshirshëm, e di që më ke falur gjithçka. Dashuria me të cilën ti ke ardhur në zemrën time është provë e qartë. O Zot, ti ke ardhur tek unë për të më dhënë një jetë të re, më të mirë. Po, pranoje shtojë këtë hir të gjitha të tjerave që tashmë m'i ke dhuruar. Jezus, bëj që më në fund të jetoj një jetë të shenjtë dhe të virtytshme, duke imituar shembujt tuaj! Bëj që të mos jetoj më unë, por ti të jetosh në mua, Hyji im! Bëj që të gjitha mendimet e mia të jenë të drejtuara kah ti, o e mira ime e madhe!

Jezus, bëj që të shqyrtoj siç duhet

O Zot Jezus, bëj që të shqyrtoj siç duhet, kush jam unë e kush je ti.

Bëj që të mos dëshiroj asgjë tjetër, përveç teje;

që unë të harroj veten e të dua ty dhe të bëj gjithçka për të pëlqyer ty;

që unë të përul veten dhe të lartësoj ty, që të mos mendoj mbi asgjë, përveçse mbi ty;

që të vdes, për të jetuar në ty, dhe të pranoj nga ti gjithçka që më ndodh;

që të mohoj veten e të ndjek ty, dhe të dëshiroj të ndjek ty gjithmonë;

që të ik prej vetvetes dhe të mbështetem në ty, që të meritoj mbrojtjen tënde.

Më jep hirin, që të kujdesem të të nderoj ty dhe t'u përkas të përzgjedhurve të tu;

që mos t'i besoj vetes, por të besoj ty dhe të bindem gjithmonë në sajë të dashurisë ndaj teje;

që krejt dëshira ime të jetë e drejtuar vetëm kah ti, dhe që të jem e varfër për ty.

Kujdesu me hirin tënd për mua, që unë të dua ty;

më thirr, që të shikoj ty dhe që të dua ty në amshim. Amen. (Shën Agustini)

Vonë të kam dashur

Vonë të desha, o bukuri aq e lashtë e aq e re, vonë të desha!

Dhe ja: ti ishe brenda e unë jashtë, aty të kërkoja.

Ti ishe me mua e unë isha me ty.

Larg teje më mbanin krijesat e tua të cilat as s'do të ekzistonin në mos të ishin në ty.

Të dua Zoti im, të dua, dhe dua të të dua gjithmonë e më shumë.

Bëj o Zot, o më i bukuri ndër bijtë e njerëzve të të dëshiroj dhe të dua aq sa dua e aq sa duhet.

Ti je i përjetshëm dhe i pakufi.

Ti duhet të jesh i dashur mbi të gjithë nga ne,

që ti të na doje e të na shpëtoje,

për të cilët ti ke bërë gjëra kaq të mëdha dhe të panumërta. (Shën Agustini)

Zemër hyjnore e Jezusit, të ofroj

O e hyjnueshmja Zemra e Jezu Krishtit, unë po të kushtoj nëpër zemër të Zojës së Bekuar Nënës së Kishës, së bashku me flinë eukaristike, lutjet dhe veprat, gëzimet dhe vuajtjet e kësaj dite, në shpërblim të mëkateve, për shëlbimin e gjithë njerëzve dhe për nevojat e Kishës së shenjtë. Amen.

Litanitë e Zemrës së Krishtit

O Zot ki mëshirë.

O Krisht ki mëshirë.

O Krisht ndjena ne

O Krisht dëgjona ne.

Ati prej qiellit Zot -

kij mëshirë për ne.

Biri, Shpërblyesi i botës Zot,

Shpirti Shenjtë Zot.

Trinia e shenjtë, një i vetmi Zot,

Zemra e Jezu Krishtit, të Birit të amshuar,

Zemra e Jezu Krishtit, në kraharor të Nënës virgjër prej Shpirtit Shenjt trajtuar,

Zemra e Jezu Krishtit, me Fjalën e Zotit qenësisht e përngjitur,

Zemra e Jezu Krishtit, madhërie të pamasë,

Zemra e Jezu Krishtit, shenjtërore e shenjtë e Zotit,

Zemra e Jezu Krishtit, tabernakulli i të lartit Zot,

Zemra e Jezu Krishtit, shtëpia e Zotit dhe dera e qiellit,

Zemra e Jezu Krishtit, furrë e ndezur dashurie,

Zemra e Jezu Krishtit, visari i drejtësisë dhe i dashurisë,

Zemra e Jezu Krishtit, plot mirësi dhe dashuri,

Zemra e Jezu Krishtit, pafundësia e të gjithë virtyeteve,

Zemra e Jezu Krishtit, krejt e denjë për çdo nderim,

Zemra e Jezu Krishtit, mbreti dhe qendra e të gjitha zemrave,

Zemra e Jezu Krishtit, në të cilën janë të gjitha visaret e diturisë dhe të urtisë,

Zemra e Jezu Krishtit, në të cilën banon krejt plotësimi hyjnor,

Zemra e Jezu Krishtit, në të cilën Ati i mirë është përgëzuar,

Zemra e Jezu Krishtit, prej së cilës ne të gjithë kemi patur pjesë,

Zemra e Jezu Krishtit, dëshira e kodrave të amshuara,

Zemra e Jezu Krishtit, e durueshme dhe mëshirëmadhe,

Zemra e Jezu Krishtit, e pasur për të gjithë ata që të luten,

Zemra e Jezu Krishtit, burimi i jetës dhe i shenjtërisë,

Zemra e Jezu Krishtit, shpërblimi i mëkateve tona,

Zemra e Jezu Krishtit, e nginjur me dhunë,

Zemra e Jezu Krishtit, e ngurtësuar për fajet tona,

Zemra e Jezu Krishtit, e dëgjueshme deri në vdekje,

Zemra e Jezu Krishtit, me heshtë e shporuar,

Zemra e Jezu Krishtit, burimi i të gjithë ngushëllimit,

Zemra e Jezu Krishtit, jeta dhe të ngjallurit tonë,

Zemra e Jezu Krishtit, paqja dhe pajtimi ynë,

Zemra e Jezu Krishtit, flia për mëkate,

Zemra e Jezu Krishtit, shpëtimi i atyre që në ty shpresojnë,

Zemra e Jezu Krishtit, shpresa e atyre që në ty vdesin,

Zemra e Jezu Krishtit, kënaqësia e të gjithë shenjtërve.

O Qengji i Zotit, që shlyen mëkatet e botës,  
na fal ne o Zot.

O Qengji i Zotit, që shlyen mëkatet e botës,  
dëgjona ne o Zot.

O Qengji i Zotit, që shlyen mëkatet e botës,  
ki mëshirë për ne.

Jezu Krisht zemërbutë e i përvujtë,  
Bëj që zemrat tona ti përngjajnë zemrës sate.

Të lutemi. O Zot i gjithpushtetshëm dhe i amshuar, sille shikimin kah Zemra e Birit tënd të dashur dhe pranoi falenderimet e shpërblimet që t'i paraqet në emër të mëkatarëve dhe atyre që kërkojnë mëshirën tënde, i zbutur, jepu faljen në emër të të njëjtit Birit tënd Jezu Krishtit, i cili jeton dhe mbretëron me ty përgjithmonë e jetës. Amen.

Bashkimi me Zemrën Hyjnore

Dashuri e zjarrtë e Zemrës së Jezusit - bashkohem me ty!

Zell veprues i Zemrës së Jezusit - bashkohem me ty!

Falenderimi i Zemrës së Krishtit - bashkohem me ty!

Besim i fuqishëm i Zemrës së Jezusit – bashkohem me ty!

Lutja e thellësisë së Zemrës së Jezusit – bashkohem me ty!

Heshtja shprehëse e Zemrës së Krishtit- bashkohem me ty!

Përvujtëria e Zemrës së Jezusit - bashkohem me ty!

Dëgjesa e Zemrës së Jezusit - bashkohem me ty!

Paqja dhe ëmbëlsia e Zemrës së Jezusit - bashkohem me ty!

Mirësia e patregueshme e Zemrës së Jezusit - bashkohem me ty!

Dashuria e Zemrës së Jezusit që përfshin gjithçka - bashkohem me ty!

Meditimi i thellë i Zemrës së Jezusit - bashkohem me ty!

Kujdesi plot dashuri i Zemrës së Jezusit për kthimin e mëkatarëve - bashkohem me ty!

Njësimi i thellë i Zemrës hyjnore të Jezusit me Atin qiellor - bashkohem me ty!

Vullneti, qëllimi dhe dëshira e Zemrës së Jezusit - bashkohem me ty!

Thirrje ndaj Zemrës hyjnore të Jezusit

Dashuria e Zemrës së Jezusit, ndize zemrën time!

Fuqia e Zemrës së Jezusit, forcoje zemrën time!

Mëshira e Zemrës së Jezusit, fale zemrën time!

Durimi i Zemrës së Jezusit, mos u lodh me zemrën time!

Mbretëria e Zemrës së Jezusit, përhapu mbi zemrën time!

Vullneti i Zemrës së Jezusit, shërbehu me zemrën time!

Zelli i Zemrës së Jezusit, shkrije zemrën time!

E papërlyera Virgjëra Mari, lute për ne Zemrën hyjnore të Jezusit!

Na kujto, o i tejetmiri Jezus

Na kujto, o i tejetmiri Jezus, se kurrë nuk është dëgjuar, që dikush, i cili ka bërë strehën e tij në Zemrën tënde të tejetshenjtë, që e ka thirrur ndihmën tënde dhe që e ka kërkuar me këmbëngulje mëshirën tënde, të ketë qenë ndonjëherë i braktisur. O Zot dhe Mbret i zemrave, e mbushur dhe e jetësuar nga ky besim, po vij me nxitim tek ti dhe, duke rënkuar nën peshën e mëkateve të mia, përullem para teje. E tejetshenjta Zemra e Jezusit, mos i nënçmo lutjet e mia të dobëta, por me hirësi dëgjoji dhe vështroi ato, o Zemra e Jezusit e butë dhe mëshirplote!

Jezu Krisht, të nderoj si Mbret

Jezu Krisht, të nderoj si Mbret të botës. Gjithçka që është krijuar, është bërë për ty. Më merr në gadishmërinë tënde. Unë po i përtërij premtimet e mia të pagëzimit dhe e mohoj të Keqin, madhështinë dhe veprat e tij. Unë premtoj se do të bëj një jetë të krishterë. Në mënyrë të veçantë angazhohem të dhuroj të gjitha fuqitë e mia, që gjithnjë të dëshmoj fenë time me guxim. O Zemra Hyjnore e Jezusit, po t'i dorëzoj ty veprat e mia me qëllim që të gjitha zemrat ta njohin Mbretërimin tënd të shenjtë dhe kështu të themelohet Mbretëria jote e paqës në mbarë botën. Amen. (Papa Pio XI)

Shpëtimtar Hyjnor

Shpëtimtar Hyjnor! Të lutem, ma jep plotësinë e bekimit tënd. Më beko, o Jezus i pasur me butësi, dhe më përforco në hirin tënd, sikur para ngjitjes sate në qiell i ke bekuar apostujt e tu dhe i ke përforcuar në tërë të mirën. Bekoje trupin tim dhe shpirtin tim. Bekoje arsyen, kujtesën dhe vullnetin tim. Bekoi të gjitha mendimet, fjalët dhe veprat e mia. Beko punët, vuajtjet dhe gëzimet e mia. Bekoje krejt jetën time, në mënyrë të veçantë orën e vdekjes sime. Që tani e mbas, o Jezus, dua të jetoj vetëm për ty, për ty dua të vdes, vetëm ty dua të të përkas, tani dhe në amshim. Amen.

Lutje emrit të shenjtë të Jezusit

Jezus i mirë, shkruaje Emrin tënd në zemrën time, që të jetë gjithmonë në buzët e mia, në mendjen time dhe në zemrën time. Jezus, ngushëllues dhe shërues është Emri yt. Për këtë ji Jezusi im kur të zgjohem. Ji Jezusi im kur fle. Ji Jezusi im kur lutem. Ji Jezusi im kur punoj! Ji Jezusi im kur gjindem në tundime. Ji Jezusi im kur të kem rënë në mëkat. Ji Jezusi im kur gjindem në vështirësi! Ji Jezusi im kur gjindem në sëmundje. Ji Jezusi im kur gjindem në rrezik vdekjeje. Ji Jezusi im në jetë, ji Jezusi im kur të vdes! Ji në gojën time kur shpirti im të ndahet nga unë, që fjala ime e fundit të jetë: Jezus, Jezus, Jezus! Amen.

Shpirtit të Shenjtë

Eja o Shpirt krijues

O Shpirt Shenjt deh zbrit mbi ne,  
e prej qielli derdh mbi ne,  
rrezet tua plot me dritë.

Eja o At' për nevojtarë,  
eja Ti n'dhanti bujar,  
eja Ti që mendjet shndrit.

Ti n'ngushtica ngush'llim bjen,  
ti ndër zemra si mik vjen,  
t'lodhun n'jetë rishtas forcon.

N'mund e djersë Ti je pushim,  
n'vapë e luftë Ti je freskim,  
lot ti terë zemrat ngushllon.

Dritë hyjnore plot shenjtini,  
shndritnaj mendjet e n'dashuri,  
kalle flakë kë n'ty shpreson.

Ku s'je Ti gjithçka dështon,  
n'natyrë t'njerit gjë s'qëndron,  
që t'jetë shenjte si Ti don.

Njollat hiq, dangat pastro,  
n'shpirt'rat tanë huret rigo,  
varr't e m'katit na i shëro.

Çka është t'brishtë kandshëm lako,  
çka është t'ftoftë me flakë rretho,  
çka është shtrembtë ëmbël drejto.

Jepna ne që n'Ty besojmë,  
jepna ne që n'Ty shpresojmë,  
shtatë dhantitë që aq dësh'rojmë.

Mundin tonë Ti na shpërble,  
n'm'kat me vdekë Ti mos na le,  
ban me Ty n'amshim t'lumnojmë. Amen.

Hyji im,

asgjë nuk mundem pa mbështetjen tënde; as për një mendim të mirë nuk jam e aftë pa veprimin tënd hirëplotë. Prandaj më eja në ndihmë, o Shpirt Shenjt. Hyj i dashurisë dhe i së vërtetës, ndriçoj arsyen time dhe ndize zemrën time me zjarrin e dashurisë tënde të shenjtë. Bëj, që t'i të gjitha mendimet e mia t'i drejtoj kah ti, kështu t'i ndjek frymëzimet e tua të shenjta. Ti, Nëna ime e dashur Maria, lutu për mua! Engjëlli i shenjtë rojtar, rri zgjuar mbi mua dhe mos lejo që armiku i shëlbimit ta shqetësojë lutjen time.

Eja, o Shpirt Shenjt

Eja, o Shpirt Shenjt, mbushi zemrat e besimtarëve të tu dhe ndeze në ta flakën e dashurisë sate. O Hyj i gjithëpushtetshëm, që i ke mbledhur popujt e të gjitha gjuhëve në bashkësinë e fesë, bëj që Shpirti Shenjtë të jetë pranë nesh, të banojë në ne dhe të na shndrisë, të na mësojë çdo të vërtetë dhe të na forcojë në të mirën. Nëpër Jezu Krishtin, Zotin tonë. Amen.

Merr frymë në mua ti, o Shpirt Shenjt

Merr frymë në mua ti, o Shpirt Shenjt, që të shenjtën të mendoj!

Më nxit mua ti, o Shpirt Shenjt, që të shenjtën të veproj!

Më josh ti, o Shpirt Shenjt, që të shenjtën të dua!

Më forco ti, o Shpirt Shenjt, që të shenjtën ta mbroj!

Më ruaj ti, o Shpirt Shenjt, që të shenjtën të mos e humbas kurrë më!

Amen. (Shën Agustini)

Shpirti i dijës

Shpirti i dijës, zotëroi të gjitha mendimet, fjalët dhe veprat e mia, që tani e deri në orën e vdekjes time!

Shpirti i kuptimit, më ndriço dhe më mëso!

Shpirti i këshillës, drejtoje mungesën e përvojës time!

Shpirti i shkencës, fito mbi paditurinë time!

Shpirti i guximit, më bëj të qëndrueshme në shërbimin e Hyjit! Më jep forcë të veproj në gjithçka me mirësi dhe me pëlqim, me butësi dhe me besnikëri, me durim dhe me dashuri, me gëzim dhe me zemërgjerësi!

Shpirti i përshpirtmërisë, më bëj të thellë dhe fëmijnore në marrëdhënje me Hyjin!

Shpirti i frikës së Zotit, më liro nga çdo e keqe!

Shpirti i paqes, më jep paqen tënde!

Shpirti i shenjtërisë, zbukuroje tempullin, që ti e ke zgjedhur si vendbanim tëndin, me virtytin e pastërtisë dhe me hirin tënd të gjithëpushtetshëm më ruaj gjithmonë nga mëkati. Amen.

Familjes së Shenjtë

Familja e Shenjtë e Nazaretit

O Familje e Shenjtë e Nazaretit, bashkësia e dashurisë së Jezusit, Marisë dhe Jozefit, model ideal për çdo familje të krishterë, ty po t'i besojmë familjet tona. Hapi ndaj fesë zemrat e familjeve, për pranimin e Fjalës së Hyjit dhe për të dhënë dëshmi të krishterë, në mënyrë që ato të bëhen burim thirrjesh të reja dhe të shenjta.

Drejtoje mendjen e prindërve, që me dashuri të përkujdesshme, me vëmendje të ditur dhe me ndrojtje të ndjeshme, të jenë për fëmijët e tyre drejtues të sigurtë kah të mirat shpirtërore dhe të amshueshme.

Ngjalle në të rinjtë një ndërgjegje të drejtë dhe një vullnet të lirë, në mënyrë që duke u rritur “në dije, pjekuri dhe hir”, ta pranojnë me guxim dhuratën e thirrjes së Hyjit.

O Familja e Shenjtë e Nazaretit, bëj që të gjithë ne, duke kundruar dhe imituar mënyrën tënde të jetesës në lutje të zellshme, dëgjuesë të lirë, varfëri plot dinjitet dhe pastërti virgjërore, të jemi të gatshëm për të kryer vullnetin e Hyjit dhe të shoqërojmë me zgjuarsiri të matur ata që mes nesh janë të thirrur për të ndjekur sa më afër Jezu Krishtin, i cili “për ne dhuroi vetveten” (krh Tt,2,14) Amen!

(Gjon Pali II, Vatikan, 26 Dhjetor 1993, në festën e Familjes së Shenjtë)

O Jezus, Shpëtimtari ynë

O Jezus, Shpëtimtari ynë, ti që je dërguar nga qielli të ndriçosh botën me mësim dhe me shembull, ti që deshe të kalosh pjesën më të madhe të jetës sate në atë shtëpi në Nazaret dhe, dëgjues ndaj Marisë dhe Jozefit, e ke shenjtëruar atë familje, e cila duhet të jetë model i të gjitha familjeve të krishtera. Pranoje në hirin tënd shtëpinë tonë, që po të kushtohet ty krejtësisht. Mbroje dhe ruaje atë, përforcoje në të ndrojtjen ndaj teje e njëkohësisht paqen dhe harmoninë e dashurisë së krishterë, në mënyrë që ajo të bëhet e ngjashme me modelin hyjnor të Familjes sate dhe në mënyrë që të gjithë pjestarët e saj të kenë pjesë në lumturinë e amshuar. Nënë e Jezu Krishtit e pasur me dashuri dhe Nënë e jona, Maria, nëpëmjet mirësisë dhe butësisë sate bëj që Jezusi ta pranojë këtë kushtim dhe të na dhurojë bëmirësitë e bekimet e tij.

Jozef i mirë, mbrojtësi i shenjtë i Jezusit dhe i Marisë, me lutjet e tua na eja në ndihmë në të gjitha ngushticat e shpirtit dhe të trupit, në mënyrë që njëkohësisht me ty dhe me të lumturën Virgjërën Mari të mundemi t’ia paraqesim Jezu Krishtit Shpëtimtarit tonë lavdinë dhe falenderimin për amshim. Amen.